



學菴類稿

史志類十

青浦 王原

明食貨志

卷十

志下之四

課稅



關市之征本於務本抑末宋元以來日以繁瑣明  
初思反元舊務於簡約其後增置漸多牟利漸廣  
大畧行者齎貨居者市鬻所過所止各有稅其名  
物件析勝官署按而征之農具書籍若非鬻於市  
者勿算其應征而輒藏匿者沒其半凡買賣田宅  
頭匹赴務投稅契本別納紙價置店曆書所止客  
估氏名物數官司有都稅有宣課有司有局有分



司有抽分場局有河泊所所收稅課有本色有折  
色稅課司局京城諸門及諸府州縣市集之處多  
有之凡四百餘所皆設官吏其後以次裁併十之  
七抽分在南京者曰龍江大勝港在北京者曰通  
州白河盧溝通積廣積在外者曰真定杭州荊州  
太平蘭州廣寧諸處又令軍衛自設場分收貯柴  
薪河泊所每歲南戶科編勘合以河字爲號南戶  
部頒給所官吏填給所收魚課米鈔計六百八十  
九道惟大河以南有之河北止河間府鹽山縣一  
處其後多所裁併各以其課領於有司稅課徵商  
估物貨抽分科竹木柴薪河泊取魚課又有門攤

課鈔戶口食鹽鈔領於有司不特置官吏至正十  
八年太祖初克婺州置寧越稅課司屬明年征酒  
醋之稅明年設關市批驗所官金華廣信諸全諸  
府州接外境者稅鹽十之一貨物十五之一旣鹽  
稅仍從舊二十取一焉比卽吳王位減收官店錢  
凡商稅三十稅一過取者以違令論改在京官店  
爲宣課司郡縣官店爲通課司是年冬通課司裁  
革者一十六所新置者二十三所洪武元年命在  
京兵馬指揮營市司每三日一校勘街市度量權  
衡稽牙僧時物價在外城門兵馬亦令兼領市司  
高麗國入貢中書省臣請徵其稅上免之六年置

北平稅課司局一百八處四川稅課司局一十六處七年彰德府稅課司稅及細民蔬果畜牧飲食諸物上聞而黜之八年華山東濟南府堰頭稅課局以在城稅課司兼領其課長淮關吏留商至閱月貨不售事聞上杖其吏追奉償之九年置湖廣四川廣東府州縣稅課司局倉庫九十四罷四川成都府稅課局一十八所令各縣兼領之山西汾州平遠縣主簿成樂秩滿來朝州上其考曰能恢辦商稅吏部以聞上曰商稅有定額若以恢辦爲能是剝削於民而失吏之職也州考非是吏部其移文訊之十年戶部奏天下稅課司局征商不如

額者一百七十八處宜遣中官國子生及部委官各一人覈實立爲定額從之十一年以蘇松杭嘉湖五府水災悉罷五府河泊所免其稅課以其利與民十三年吏部言天下稅課司局歲收額米不及五百石者凡三百六十四處宜罷之詔可是年胡惟庸伏誅上諭戶部曰曩者姦臣聚斂稅及天下織悉之物朕甚恥焉自今軍民嫁娶喪祭之物舟車絲布之類皆勿稅罷天下抽分竹木場明年令以野獸皮輸魚課製裘給邊卒時河泊所官侵盜魚課刑部論死詔免之又山東漁戶匿稅論流者六十人上亦宥之諭河泊所不得以欄棧擾民



第令網戶修葺二十年戶部言天下稅課司河泊所課程視舊有虧宜准十八年爲額上曰商稅歲有不同宜因其多寡從實徵之國初河泊所皆納魚油鰓翎毛二十三年詔翎毛非土產者免徵二十四年詔京師小民鬻販者毋入塌坊初京師軍民居室皆官所給連廊比舍無復隙地商貨至或止於舟或貯城外民居駟僮之徒從而持其價任意低昂商人病之上知其然命於三山諸門外瀕水爲屋數十楹曰塌坊商至悉貯貨其中又置六畜場頓牛羊等畜旣納稅各從其自相貿易革罷官私牙行駟僮無所與凡商貨以三十分爲率官

稅其一分又令出免牙錢一分房錢一分以給守跡者商旅稱便其後成祖令京城官店塌房依南京例二十六年龍江大勝港俱設立抽分竹木局及令軍衛自設場分收貯柴薪月給禁軍孤老竹木堆垛旬奏數柴草三取一竹木十取二三十取一有差二十七年令凡城市沒官房屋軍官軍人住者不取賃錢三十年令自懷慶以下至沙河口迤邐黃河聽民採魚不收課程永樂初令凡軍民之家嫁娶喪祭時節遣送禮物染練自織布帛買旣稅物車船運已貨物農用器小民擔鬻魚蔬民間園池雜果非市販者及常用雜物食品竹木蒲



草銅錫器皿具免稅山東臨清會通稅課局洪武  
歲辦課鈔八千七百五十三貫比年兵旱民流商  
少元年止季收二十九貫五百文戶部以聞二年  
請減舊額上悉免之以都御史陳瑛言徵戶口食  
鹽鈔以通鈔法明年免農民戶口食鹽鈔六年設  
通州白河盧溝通積廣積抽分竹木五局既復定  
抽分例三十分取一取二取三取五取六取十五  
有差改北京順天府稅課司爲都稅司其州縣長  
官司陞爲府者稅課局改爲稅課司七年差御史  
監生於收課處牒辦課程二十一年山東巡按陳  
濟言淮安濟寧東昌臨清德州直沽商販所聚今

都北平百貨倍往時其商稅宜遣人監牒一年以  
爲定額上從之在外稅課有撥賜諸王者國除復  
設官領之洪熙元年增市肆門攤課鈔宣德四年  
行在戶部以鈔法不通由商居貨不稅市鬻沮撓  
請增稅由是北京順天府南京應天府直隸蘇州  
松江鎮江淮安常州揚州儀真浙江杭州嘉興湖  
州福建福州建寧湖廣武昌荊州江西南昌吉安  
臨江清江鎮廣東廣州河南開封山東濟南濟寧  
州臨清廣西桂林山西太原平陽蒲州四川成都  
重慶瀘州三十三府州縣商賈所集市鎮店肆門  
攤稅課增舊十倍上以過重令增五倍俟鈔法通



復初又兩京蔬果園不論官私但種鬻者蔬地畝  
月納舊鈔三百貫果十株歲納一百貫其塌坊庫  
房店舍居商貨者間月納鈔五百貫騾驢車受僱  
裝載不分出入輛納鈔二百貫委御史戶部錦衣  
衛兵馬司官各一於城門察收船受僱裝載計所  
載料多寡路近遠納鈔蓋於是始設鈔關也其倚  
勢隱匿不報不納鈔者地樹船車房舍俱沒官仍  
罪之其非市鬻受僱若空者皆舍明年侍郎郝鵬  
又奏令應天織造幣帛若市鬻者並頓塌貨物之  
家月納門攤鈔五百貫從之御史耿定請以臨清  
依在京例收鈔明年侍郎曹弘奏云比有司令里

老列上塌坊一時畏懼虛報月責納鈔五百貫良  
苦有鬻子女業產輸官者上令覈除之時鈔法通  
減北京蔬地課鈔之半洪武時商稅魚課所收鈔  
道遠者易金銀以進比鈔貫直銀一兩金一錢六  
分其後遂以爲額巡攔網戶因以賂累溫州府以  
爲言仍令納鈔湖廣廣西浙江魚課並折收鈔先  
年阻鈔倍罰商稅令減罰數十之三塌房十之五  
在京塌房如故貴州思南府奏減課額外增加鈔  
數八年命舟車課鈔舊額外增加未減免者減三  
分之一明年以天旱復敕諭浙江湖廣南直隸衛  
所府州縣見徵稅課及車船門攤地畝果木一應



學考類和  
課鈔正額外因鈔法增加者免十之四英宗登極  
詔令凡課程門攤諸項照洪武舊額不得名鈔法  
妄增先是稅課司止收木竹三十分之一時以修  
漕舟增收麻油諸物料裁革稅課司局收鈔不及  
五萬貫者事簡者亦頗有併省獨淮安軍民舟車  
非遠行載貨者稅及甘肅十三衛所菜果園鈔京  
城外菜地稅鈔先後併省河泊所不一獨南京浙  
江諸處都司直隸衛所軍職菜園鈔令塌房車輛  
鈔貫俱減半徵收又令勘減商少稅虧累民賠納  
者正統九年置彰義門官房收商稅課鈔真定府  
南關稅課局置攢典主抽分山西商販材木舊制

稅課司局官攢不給俸日令巡攔供給至是仍與  
俸免其供給其後河泊官亦依此例十一年復設  
諸革罷稅課司局凡辦課一萬五千貫若市集離  
有司路遠及軍衛相參者皆復設照永樂七年額  
其見辦課鈔比舊增多者以見數爲額雲南貴州  
原無牘辦之處令以一年爲額所收課存給官吏  
旂軍俸糧先是以于謙奏革稅課司局罷置官領  
其稅於有司上下稱便而吏員例當授是官者皆  
以革罷爲淹擲於是戶部尚書王佐言天下稅課  
有視舊宜增之處而市鎮有去府州縣路遠若辦  
課一萬五千貫以上者悉宜復設官上從之明年



鎮守陝西興安侯徐亨等奏比戶部議欲依永樂間例增市廛商賈課鈔復司局臣惟陝西海歷兵荒蒙恩蠲征發賑民始蘇息今欲增稅則視昔加四倍且司局復設擾民非便事下戶部佐持之不服從淮安府課鈔舊一百三十四萬餘貫十一年增至一百八十餘萬國初取勘市鋪酒醋稅歲久戶絕累及里甲至是令覈實增除十二年令巡視場房御史同順天府估計貨物直鈔頒收稅各司爲式令戶部主事於淮安臨清順天府委官於張家灣牘辦課鈔商稅景帝命門攤商稅課程依洪武年額戶部奏京城都稅等司設自永樂年者依正

統間例是時京師紵絲疋三梭布疋各稅鈔至三百五十貫當物直四之一太醫院醫士以爲言命量減紵絲疋稅七十五貫他稱之南京大理寺卿薛瑄言抽分細民斫造薪炭竹帚耒擔匿不報者當以舶商匿番貨罪盡沒之過重請得比匿稅律上可之減遼陽張家灣課鈔之半令京師及張家灣歲收淮麩十五萬觔送光祿寺採木至京者南京抽分五之一淮安抽三十之一至張家灣又抽分五之一四川宜賓縣民訴於上命張家灣准淮安例收之天順元年詔稅課司局河泊所依成祖額徵收革罷不及萬貫者領之有司成化七年



增置蕪湖縣荊州沙市杭州城南三處工部官抽  
分竹木先止收課鈔至是工部尚書王復建議行  
之以所抽分變價助營繕是年得千餘兩其後歲  
益至以萬數商人愁苦怨讟盈路矣二十一年順  
天府委官於正陽門外稅課司崇文門宣課司監  
收商稅二十二年詔天下有司徵稅毋取餘價孝  
宗初御史陳瑤言崇文門監稅官以措剋爲能非  
國體於是禁客貨外搜阻其餘車輛御史徐禮請  
革蕪湖荊州杭州抽分及原非奏擬之處不從又  
言川廣板木旣抽分於荊州復抽分於湖廣蕪湖  
請停止從之九江安慶鎮江及河南魯山諸處舊

設抽分竹木廠有司王官假修造名私徵者敕巡  
按嚴禁停止崇文門御史差裁革平越衛都勻府  
稅課司局十二年以巡撫彭禮言減應天府司局  
稅課鈔三之一南京龍江關瓦屑壩二抽分竹木  
局舊例月給抽分內官茶果鈔三十貫顧措取數  
十百倍十三年南吏部論其弊請令折收銀三十  
兩令湖廣料廠歲選有司監收又令順天府委官  
於草橋蘆溝橋宣課司監收商稅商貨赴京者以  
十分爲率張家灣起條三分崇文門收稅七分武  
宗初革張家灣起條收回諸王奏討河泊所稅課  
司正德七年以寇亂商貨不通減九門錢鈔十之



二三十一一年始收泰山碧霞元君祠香錢從鎮守  
太監言也十二年六月御史胡文靜甫請革新設  
抽分禁橫索助貢明年三月真定抽分太監鄭璽  
卽奏復順德府之宋家莊廣平府之曲周縣部臣  
依阿橫征之端復起而內官監劉養又以缺物料  
奏差本監官之湖廣浙江抽分廠會同主事申半  
抽分上復從之以養往湖廣馬俊往浙江旣而馬  
俊監權杭州蕪湖竹木應代劉養復爲奏留廣東  
稅鐵每萬觔稅銀二兩領於鹽官世宗初抽分內  
臣及稅課司局多所裁革又革真定諸府抽印木  
植內臣詔廣東江西商販自北而南者於南安自

南而北者於南雄稅勿重徵弘治初年京城九門  
歲入稅鈔六十六萬五千八百貫錢二百八十八  
萬五千一百餘文至其末年數益減自正德七年  
以後則鈔增至二百二十五萬八千九百有奇錢  
增至三百一十九萬三百有奇嘉靖三年詔如弘  
治初年例仍減錢三十萬四年從鎮守薊州太監  
李能請於山海關權商稅八年主事鄒閱言廣寧  
入里舖前屯衛旣有權塲山海關不宜再權議從  
之後十年詔復山海關稅罷八里舖店錢十年令  
正陽門宣課司德勝門分司安定門稅課司順天  
府都稅司依崇文門分司例置通知文簿季送戶



部順天府備覈二十四年令寶源吉慶福德等七  
店每貨一船徵銀五兩令順天府收解二十五年  
令武昌府委官收元賜楚王稅課司稅歲給楚王  
銀一百兩餘備撥給各宗藩三十二年居庸關南  
口抽分未經抽稅商貨四十三年詔商船由湖口  
上流至江西下流至蕪湖者征之四十五年淮安  
府過壩米麥雜糧石徵銀一釐隆慶元年遣內臣  
抽木真定郡佐無得參預明年止勿遣淮安府舊  
有過壩脚頭斛夫銀歲九千二百餘兩五年復稅  
過壩牙銀之半萬曆二年太監復請部議格不行  
三年奏准仍遣崇文門通州二草場歲徵稅解太

倉寶和二店十年鑄給二分司關防十一年革過  
壩脚斛等稅並天下私設無名稅課又革陝西諸  
府州縣鎮店私稅革皮布稅十二年革湖廣諸府  
州縣鹽稅茶稅襍稅牙稅河稅然自隆慶以來凡  
橋梁道路關津私擅抽稅網利病民之處累詔查  
革卒不能去巡視盧溝橋御史胡克儉言馬鞍山  
新城橋每車稅錢五文馱者三文擔者二文負者  
一文甚至徒手過者亦不免目得萬餘錢紅橋尤  
甚二十四年兩宮災明年三殿災營建費不貲始  
開礦增稅凡天地之藏財利之藪搜抉不遺餘力  
當是時無名之稅有若天津之店租廣州之珠權



兩淮之餘鹽京口之供用浙江之市舶成都之鹽  
茶重慶之名木湖口長江之船稅荊州之店稅寶  
抵之魚葦又有門攤商稅油布雜稅中使遍布天  
下非領稅卽領礦驅脅官吏務朘削焉湖口船稅  
奏自神武衛千戶朱仁等謂歲可得銀萬餘兩掣  
賣兩淮沒官餘鹽奏自鴻臚寺主簿田應璧皆始  
於二十六年明年以千戶鄭一麟百戶馬承恩奏  
遣內官高案權京口暨祿權儀真大學士沈一貫  
言二處止隔一江難兩稅上免京口牘差時權稅  
者劉成於浙李鳳於廣州皆徵市舶司陳奉於荆  
州陳增於山東皆徵店稅孫隆於蘇杭魯坤於河

南孫朝於山西丘乘雲於四川梁永於陝西皆領  
稅務或以開採兼領王忠於密雲張燁於盧溝橋  
皆帶徵諸弁馮綱等望風言利朝奏夕可所遣稅  
監均其所薦稅監行亦卽以原奏同往焉陳增馬  
堂爭稅上平之詔堂稅臨清增稅東昌而王忠張  
燁亦相爭上命撫按官定其界馬堂以橫征激民  
變堂射殺二人衆縱火焚其廨格殺叅隨三十四  
人堂賴守備王煬救免旣反以爲煬罪逮問之時  
天津上新河數民譁儀真之變內臣暨祿委罪於  
守禦楊應元比逮應元祿又爲乞原詔釋之趙奉  
由武昌之荊州商民數千人沿道譟詈擲擊瓦石



既於襄陽商復聚謀未幾武昌民逐奉奉匿楚府  
命甲騎殺傷二三十人奉踰月不敢出衆執奉左  
右五六人投之江奉自燬其署門先後誣奏降逮  
者甚衆自是以後屢有民變李鳳激變新會孫隆  
激變蘇州蘇州民葛成等執投稅官六七人於河  
楊榮激變雲南殺委官張安民既乃殺榮焚其屍  
劉成激變常鎮潘相激變江西梁永激變陝西高  
淮激變遼東王虎激變香河王朝以稅煤激變山  
西地方有司悉遭誣劾時千戶王承德奏請稅廬  
州鳳陽徽州安慶四府歲可得銀四萬兩百戶吳  
鎮奏請抽太平安慶廬州淮安揚州常州鎮江沿

江商賈船遺稅歲可得銀八萬兩詔暨祿領之仍  
令原奏官同往百戶王體仁奏徵沿江船遺稅湖  
廣歲可得銀七萬兩詔陳奉領之廣洋衛鎮撫戴  
君恩奏徵廣東遺鹽及名馬天鵝諸土產既暨祿  
以原奏不實請按實徵解當日權使多取盈祿疏  
凡五上始得請湖廣遺稅亦以難徵減爲一萬兩  
而陳奉水陸重徵徵三解一民怨沸騰旋爲湖口  
稅監李道攻訐上命杜茂代之張燁聽姦民劉大  
倫於宛平大興二縣徵金玉珠寶牙商銀一萬五  
千兩尙書陳藻奏免之一時稅監多用姦民爲爪  
牙陳保程守訓尤恣橫新會之變由保開告密興



獄株連蔓延清端之吏率以受賕誣之守訓歛人也屠沽淮陽市竊娼而逃陳增以娼兒子也引守訓用之山東淮徐諸路稱武英殿帶銜中書奉密旨訪各處富商搜求天下異寶法非軍情不得用旗牌非撫鎮不得立中軍守訓皆借用之於歛建坊曰帝心簡在門張黃幟曰皇恩特建其所親微規之對曰我自出都城門我頭顱已不在我頸矣誣灸富人備極慘毒不傾其貲不止內外大臣疏論其罪兩淮鹽務少監魯保亦疏劾之皆畱中山西巡撫魏允貞與稅監孫朝互訐朝疏入輒報可而允貞疏入輒寢尙書李戴疏論以爲損國威壞

政體不聞巡按劉日梧言湖口不二百里爲安慶安慶不百里爲池口池口不百里爲荻港荻港不百里爲蕪湖蕪湖不數十里爲采石采石不百里爲金陵金陵不數十里爲瓜埠瓜埠不數十里爲儀真長江揚帆日三四百里三四百里之內攔截抽稅五六處謂非重徵疊稅乎巡按安文璧請減畿內稅額稅銀舊七萬兩益以魚葦稅銀四萬兩民無所出口梧又劾程守訓矯特旨建坊堂中縣額書咸有一德請加罪皆不聞稅契本者制每兩三釐徽州府獨稅二分萬曆中得減如制至三十年通增爲三分是年特給守備太監邢隆徵收徽

州寧國二府產稅敕書關防沈一貫疏爭之以爲立制本以杜爭非爲利也近年由三釐增至三分濟邊餉元云總天下歲可十萬今乃云二府可得一十五萬假使寸田尺宅皆易主亦難盈也疏入不聞時江西稅監潘相爲儒童所鬪并捕宗室奉國將軍謀圯毆折肢體上不問是時杜景云奏徽州監生曹應鵬進殿工銀六萬兩閩應隆張嶷奏海澄縣機易山產金銀歲可淘金十萬兩銀三十萬兩旣驗非實乃罷袁順時奏徽州稅契銀二十萬兩王遇杜亦言徵南直稅契銀二十萬兩高淳馬場變價每場可得銀千餘兩武弁市井言利者

競進所進稅或稱遺稅或稱節省銀或稱額外稅銀或稱罰贖爭取悅上爲能內監王朝採煤山西窑民不勝苦爲變復奏上窮治之輔臣以爲如朝言歲止得數十金利甚微也請撤朝併停煤稅不聽已因太監陳永壽奏乃撤朝其所領窑依上林苑監例徵稅解監永壽遂代朝仍徵及民窑取盈縣官焉三十三年十二月詔罷採礦以稅務歸有司明年正月又罷甘肅延綏二鎮鹽引稅銀巡撫黃克纘奏減山東稅三萬三千兩時陝西雲南民變相繼稅歸有司而稅使不撤李道更詭稱有司固卻乞如舊便上遽從之故李道之抽湖口潘相



之採土青馬堂之採魚鮮者皆如故焉寶坻銀魚  
廠永樂時設穆宗初止令估直取備廟祀上供萬  
曆二十八年始以內官坐採又徵其稅後又以兩  
監分採并稅武清等縣非產魚之處增葦網諸稅  
目計二萬餘兩久且徵及青縣天津焉三十五年  
陝西稅監梁永樂綱再毒巡按余懋衡幾斃時九  
門稅尤苛碎舉子皆不免甚至擊殺覲吏事聞詔  
法司治之由是監豎小戢潘相在江西議造船運  
瓷器巡按史弼疏陳其非便乃止於時李道監稅  
湖口糧船驗放差池風覆五舟溺死數十人漂糧  
五千餘石弼連疏劾之由是道不敢復駐湖口潘

相亦以江西磽瘠民數變自請歸矣梁永之毒懋  
衡咸寧縣獲其下蠱者永擐甲趣縣縣人閔然謂  
永反也於是時捕諸黨急諸黨稍稍叛去皆挾重  
貲恐爲有司所述率名內遣列刃方陣而行捕者  
追及之先是永遣進馬者亦被獲於是永以劫貢  
聞上怒甚逮知縣滿朝薦下詔獄而令撫按護梁  
永還京並撤樂綱稅務併之河南陝民始稍蘇也  
諸璫中暨祿爲稍愿初自儀真之徐州目擊商民  
困苦請以稅歸有司並請停免求回京時論頗許  
之河南巡撫沈季文建議徵稅之法當稅富不當  
稅貧當有官稅不當有私稅當徵有稅之稅不當

徵無稅之稅典舖宜重而反輕擔負宜輕而反重  
此貧富之失平也未稅以前之小稅迄今不減中  
州行戶之換帖納穀名公用備賑實不取此無慮  
皆充私橐誠以行穀完公稅可以蠲下戶之小稅  
此官私之當酌也若河決水渰而欲追賠則無稅  
之稅也其論率綜核名實非不當時弊顧自是多  
言典舖積穀事者矣自陳奉梁永而後天下稅務  
漸歸有司江浙閩廣稅監猶未撤然止主領解爪  
牙無權未遽與有司爲難其請自徵則福建稅監  
高案首發之初案與巡撫徐學聚頗相能案欲引  
紅夷入市學聚拒之因以失案心案遂疏詆學聚

自請依月徵解並言外國方物歆動上心上亦未  
之許也四十二年李太后遺誥減天下稅額三分  
之一免近京畸零小稅張燁不奉誥止引附三分  
減一之例通灣諸稅仍全徵之順天永平新增過  
路落地二稅總二萬兩尤瑣屑爲民累旣雷震燁  
樓居被燬人以爲天怒云追上崩光宗立始盡蠲  
天下額外稅銀撤回稅監其派入地畝行戶人丁  
間架者一切免之天啟初蕪湖荊州木稅始收銀  
又稅吏胥頂首依田房例每兩稅三分年滿代者  
復出如前五年戶部尚書李起元請復權稅水陸  
衝要依萬曆二十七八年例量徵什一允行之崇



學耆類稿  
十七  
禎九年議增稅貨款項十一年停崇文門稅蓋自  
是以後商稅之虐雖不似萬曆時而橫征乃在民  
田矣

國初止稅商未有船稅也宣德四年始以鈔法不  
行沿兩京水道設關收船料鈔於時有灤縣濟寧  
徐州淮安楊州上新河許墅九江金沙洲臨清北  
新諸鈔關量舟大小修廣而差其額謂之船料輸  
船料者勿復稅其貨臨清北新則兼收貨稅各差  
御史及戶部主事監收自南京至淮安淮安至徐  
州徐州至濟寧濟寧至臨清臨清至通州每船一  
百料納鈔一百貫其兩京直抵者五倍之既減一

百貫爲六十貫正統四年復減爲四十貫取回監  
收御史從戶部議罷濟寧徐州收船料鈔六年罷  
南京上新河收船料鈔十一年臨清淮安仍差主  
事移灤縣鈔關於河西務委官監收令武清縣解  
京明年減船料四十貫爲二十貫時鈔法疏通從  
杭州知府高安之請也景泰元年復減爲十五貫  
許墅北新九江金沙洲各差主事六年撤回各鈔  
關主事令府選委佐貳輪收或巡河或巡按御史  
兼轄之成化元年罷收蘇杭淮揚臨清九江金沙  
洲諸處船料鈔二年差主事二員於九江金沙洲  
監收定爲則例一年後府委官收三年委官監收

蘇杭二府四年罷蘇杭金沙洲九江四鈔關六年復設金沙洲鈔關令府官輪收七年復設九江蘇州杭州三鈔關并河西務各差主事監收弘治元年仍各委府州佐貳六年復命戶部官領蘇州九江臨清南戶部官領淮安揚州杭州各鈔關歲更各給精微批十四年裁臨清鈔關主事十六年復正德元年裁各鈔關主事四年復命戶部官領河西務許墅九江南戶部官領淮安揚州北新各鈔關嘉靖六年革上新河鈔關七年各關頒發稽考簿二扇一與州縣委官注收數二令主事案報察實注數差回以一繳部八年照弘治六年例折收

銀始時估船料徵稅既以估料難核易上下共數乃度梁頭廣狹爲準自五尺以上至三丈六尺嘉靖初令以成尺爲限勿科畸零十二年詔復鳳陽府正陽鈔關稅課舊時正陽歲課三千餘兩以給高墻庶人旣而積羨足支三歲暫停至是仍復之四十一年令荊州蕪湖九江兩浙許墅揚州淮安臨清河西務各關歲額定數外餘饒悉入公帑隆慶二年始給主事關防敕書明年令鈔關去府近者知府收解去府遠者令佐貳官收貯府庫季解部官主核商所報數以定稅數收解無有所與神宗時令商貨進京者河西務給紅單赴崇文門併



納正條船三稅其不進京者河西務止收正稅免  
條船二稅又商貨臨清貿者全稅往他處貿者臨  
清稅六分貿處稅四分往河西務崇文門貿者臨  
清稅二分給紅單至貿處稅八分戶部尙書趙世  
卿疏云崇文門河西務臨清九江濟甯揚州北新  
淮安各鈔關歲徵本折約三十二萬五千五百餘  
兩萬曆二十五年增銀八萬二千兩此定額也乃  
二十七年以後歷歲減縮至二十九年總計解二  
十六萬六千八百兩究厥所由則以稅使苛斂商  
至者少若河西務布舖舊一百六十者今止存十  
之二矣臨清段舖舊三十有二者今止存十之三

布舖舊七十有三者今止存十之四雜色舖廢者  
四十一家遼左布商絕跡不至向時夥商三十八  
人爲沿途稅使抽罰折閱僅存二人矣淮南則河  
南商販多爲儀真徐州稅監所截矣連年稅使之  
所供進卽此各關不足之數也崇禎初增關課每  
兩一錢通入關計增五萬兩三年復每兩增二錢  
崇文門河西務不增臨清增一錢尙書畢自嚴議  
增南京宣課司稅額一萬兩者爲三萬兩南尙書  
鄭三俊謂落地貨稅無幾請稅蕪湖以當增數自  
嚴遂議稅蕪湖三萬兩而宣課額仍歲增一萬兩  
於是三俊悔疏爭南侍郎呂維祺亦論蕪湖當罷

自嚴皆持之於是始稅蕪湖也十三年增關稅二十萬兩其課程始收鈔聞折收米憲宗時錢鈔中半兼收末年折收銀其後本折逐年輪收大畧本色歸內庫折色歸太倉

海外諸國來貢獻者必載其物貨與中國交易乃設市舶司置提舉官以主之始於太祖吳元年洪武初設於太倉黃渡尋罷復設於寧波泉州廣州七年罷未久議復凡外國貢獻有常期遠者十年近亦二三年人數少者百人多不過三百人若來不及期與人數過限者止勿納禁瀕海居民及守衛官軍將士私通海外諸國洪武四年上諭免征

占城海船永樂元年西洋刺泥國回回哈只馬哈沒奇刺泥等來朝貢附載胡椒檳榔與民互市有司請徵其稅上曰商稅者國家以抑逐末之民豈以爲利夷人慕義遠來欲侵其利所得幾何而虧辱大體三年帝以海外諸番朝貢之使益多命於福建浙江廣東市舶司各置驛以館之福建曰來遠浙江曰安遠廣東曰懷遠四年又命外國使臣往來界上者皆宴勞之五年設交趾雲南市舶提舉司接西南諸國來朝貢者始時進貢海舟至有司封識俟奏報然後起運宣宗命至卽馳奏不待報隨與驗注運送至京正統初暹羅國船失風漂



至廣東市舶太監熊宣請徵其稅上責爲妄撤回以畢真代之十一年賜占城國王書曰王國歲遣使來朝風濤不測已敕令如安南諸國例三年一貢今復歲遣不可其遵前敕成化十四年禮部言琉球國貢獻二年爲限今其國王嗣立奏請歲貢宜勿許上是之廣東市舶司太監韋眷奏乞均蠲餘戶六十人添辦方物布政使彭韶奏減其半弘治十一年令夷人朝貢至京於會同館開市五日若以應禁軍器售番人及私往來者罪至死武宗時畢真奏舊制泛海諸船俱市舶司專理近領於鎮巡及三司官乞如舊便禮部議市舶職司進貢

方物其泛海客商及風泊番船非敕旨所載例不當預奏入詔如熊宣舊例行宣先任市舶太監也嘗以不預滿刺加諸國番船抽分奏請兼理爲禮部所劾而罷劉瑾私真謬以爲例云浙江市舶太監崔瑤誣奏知府崔唐逮繫降爲知州嘉靖初提督浙江市舶提舉司太監賴恩乞換敕諭兼提督海道遇警得調官軍有旨許之兵部執奏以爲市舶原無提督沿海之職雖有成化間林槐例出於創行尋復改正不得援比不聽嘉靖二年日本諸道爭貢大掠寧波沿海諸郡給事中夏言上言倭患起於市舶遂罷之按國初雖絕日本而三市舶

司不廢蓋東有馬市西有茶市南有市舶所以通中外之情遷有無之貨收徵稅之利減戍守之費禁海賈抑姦商使利權在上也自市舶內臣出乃始苦之然所當罷者市舶內臣非市舶也至是因言奏悉罷之於是利孔在下而姦豪外交內訐海上無寧日矣三十九年唐順之條議復浙江福建廣東三市舶司部議從之時廣東先復浙江以巡撫劉幾言寢其議福建開而復禁萬曆二十一年復通福建海市禁市稍黃二十七年乃始復置浙江福建市舶司皆以內臣領之

西陲茶市始於洪武遼東山西互市始於永樂正

統聯番族以控北虜結三衛以攜海西俺答封貢羈縻勿絕皆邊計也茶市詳茶法中永樂三年兀良哈等處韃靼以馬至遼東互市定直四等上直絹八布十二次半之下二等各以一遞減於是設

開原廣寧二馬市十年徙廣寧衛鐵山馬市於團山以便水草中間廢成化時陳鉞巡撫遼東復開既通事劉海姚安稍侵牟之朶顏諸部懷怨擾廣寧不復來市王越爲兵部尙書懼罪及已乃奏言初立馬市非資夷馬爲用蓋以結朶顏之心撤海西之黨宜於市日令叅將布政司官各一員監之毋有所侵尅仍治劉海姚安之罪正德時令馬市



學菴類稿  
三  
驗放夷人入市依期出境禁挾弓矢非互市日不得輒近塞垣初遼東馬市許令海西并朵顏三衛入市開原月一市廣寧月二市以互市稅充撫賞此成化十四年事也萬曆二十三年小叟青請於義州太康堡開木市聽順河運木進市亦以木稅爲撫賞巡撫李化龍疏行之二十六年巡撫張思忠奏罷木馬二市於是叟青等數寇抄且求復市總兵李成梁爲之力請長昂諸酋亦請復寧前木市二十九年薊遼總督萬世德疏於朝復開馬木二市初正統三年大同巡撫盧睿請立馬市令軍民平價市駝馬達官指揮李原等通譯語禁貨兵

器銅鐵上從之自後乜先強盛貢馬要賜桀驁不恭馴致土木之變嘉靖三十年以仇鸞言詔於宣大開設馬市以侍郎史道總理之歲兩市兵部員外郎楊繼盛諫不從俺答旋入寇抄大同市寇宣府宣府市寇大同甚至朝市暮寇幣未出境而警報隨至上始悔之召道還然諸部嗜馬市利未公言大舉邊臣多畏懾以互市啗之冀勿絕三十一年罷大同馬市宣府市猶不絕旣而抄掠不已乃詔絕之隆慶四年俺答孫把漢那吉率其屬阿力哥等十人來降宣大總督王崇古畱之於是封貢互市之議復起崇古條奏其事上從之封俺答爲

順義王宣大互市復開始猶省客餉減哨銀充撫  
賞費乃頻年加賞要求無厭繼以剽掠所費過當  
夷益以驕萬曆五年俺答自甘肅求開市巡按李  
時成言番以茶爲命若虜得茶制番必轉而  
從虜乃禁勿許九年俺答歿其妻三娘子事中國  
甚謹封爲忠順夫人歷世貢市不絕邊境以寧



國初務節

無糜費太祖却貢香米人參

葡萄酒以爲勞民仁

光祿卿井泉奏歲例遣

正官往南京採玉面狸之下曰小人不達政

體朕方下詔盡罷不急之務以息民望以口腹細

故失大信耶宣宗初立應天府請鈔給永樂年

市價上曰市直踰三年不給民何所之此有司不

恤民也後有犯者罪之罷永之河州官買乳牛

造上供酥油以其牛給屯軍司之戶之向

徵順天府葛稽蘆葦蒲麻以數千計命免三之二

戶部奏辦光祿厨料上曰光祿供祭祀賓客固不

可缺然與多取於民莫若儉以足用宜樽節不

過中厨役訴寺官竊減外夷供給通政司以聞上

命繫治之曰光祿之弊不止此自祖宗以來飲

供給皆有定規今擅增減不當毋謂飲食細故華

元殺羊享士羊斟不與遂致喪師勾踐投醪於江

與衆共飲遂成霸業以此而論所繫豈輕既命御

史二察視光祿寺凡內外官多支若需索者令執

奏時歲支天財庫錢一千八百萬文鈔四百萬貫

至正統初始歲會用物均有司支撥官錢依時估

收買僉大戶解納英宗減南直隸州縣孳牧黃牛

四萬厨料糖蜜三之二革添臘禽物酥油各以萬

計放回老疾厨役省湖廣江西諸處薦新茶芽七



千五百餘斛

勛牲口料食粳糯粟米粟稻

穀凡數萬石

亦各減省有差江岸歲進鳥獸悉令送南京光祿寺撤諸處捕魚官有請令市民喂養牲畜上恐厲民命之內官監上卽位甫數月蓋所樽節矣凡上用饜亭器皿總三十萬七千九百有奇令南工部整造其金龍金鳳白瓷諸器造自饒州硃江饜榼諸器造自營繕所進宮中食物尚膳監率乾沒器皿上令具帖備書如數還之免順天真定保定市償永樂時所領官牛羊命以公帑錢市用增廚後月糧八斗爲一石納米粟穀糠先呈樣戶部驗

中令寺如樣收受省往返退出勞民月市魚菜令官集市民視時貴賤估直七年罷給大臣朔望酒饌先因外國使臣來朝牲牢數缺暫停至是遂著爲令解送果品廚料有經南寺轉送北京者限以八月物不及時多致損壞上從周銓言計產地勿拘先後亦勿關南寺景帝時言者奏寺卿奈亨詐稱上皇旨日給太監王振酒饌當以詐傳詔旨罪凡諸司傳奉上旨必覆奏施行惟光祿寺但附錄文簿故以是爲亨罪然光祿中旨日常十餘卒不能覆奏如諸司也上嘗減歲用廚料十之四于謙奏罷真定河間採野味直沽海口造乾魚內使天



順八年二月戶部議光祿果品物料凡一百二十六萬八千二百餘觔早於諸司府縣給辦其數增於舊額幾四之一成化元年詔光祿寺牲口不得過十萬果品勿粘砌明年寺臣隨以供應不足請添禮部言正統間本寺鷄鵝羊之類歲費不過三四萬天順以來增至十六七萬暴殄過多請從元年正月詔後二年給事中陳鉞奏光祿寺市物不復計直槩以勢取負販遇之如被劫掠臣惟光祿所供既有天下州郡之額又有上林苑監進納之數昔皆足用於今何獨不然非宣索過額卽侵漁妄費幸節約嚴飭之魚果歲額一百三十五

萬八千餘觔量減十一後以用度不足復增果品三萬一千五百觔白熟粳米歲額四萬六千石亦增四千石十三年戶部奏減免新增之數十六年命以鷄鵝易爲豬羊各如其數復准鷄數易豬鵝以數千計添派湖廣諸處買辦小大不侔價過十倍仁宣時廚役原額六千三百八十四名成化十一年奏添五百名二十三年太監山青又奏添一千名名月食糧一石日支白米八合弘治二年尙書耿裕乞停止折易豬羊減山青奏添廚役上第令減折易豬一千明年命尙膳光祿減元年後增加供應五年尙書彭韶奏請開列公私日支數取

自上旨減削十年 天國公張懋等以災異乞免折  
易豬羊從舊並節損近年增添筵宴傳辦祇應之  
類上可其奏光祿卿杜鳳執奏上復可之十四年  
命暫免山西河南山東順天八府明年歲辦果品  
廚料及內府供用庫料物有差又以西北邊遠時  
告改派供應牲口於東南諸郡縣言者累奏從弘  
治元年例至是始命行之上喜建齋醮屢御素膳  
一歲凡一百一十一日素膳日禁本寺屠宰十五  
年光祿卿王珩等列上內外官役酒飯及所畜鳥  
獸料食之數凡一百二十事上降旨有仍舊者有  
減半者有停止者於是放去乾明門虎雜免若南

海子貓西華門鷹犬之不堪者山羊綿羯羊御馬  
監山猴食半之雜鳥鴿西安門大鴿食減三之一  
其仍舊存養者食亦量減自成化以來添坐家長  
隨七八十員傳添湯飯內臣一百五十餘員天下  
常貢不足於用乃責買於京師舖戶官值不給市  
井負累劉大夏因天變上言乃復下令裁減內臣  
歲省光祿銀八十餘萬又命減十八年以後廚料  
十分之二武宗時各宮日進月進數倍天順時牲  
果銀月費一萬七百餘兩天財庫錢糧至七季不  
得關支世宗初額設廚役四千一百名數減於舊  
歲用銀額二十四萬一千餘兩實止用十三萬節



年餘積工役兵興借用常至數十萬兩二十六年以後歲有加添歲用乃四十萬兩三十二三年稍減猶用三十六萬餘兩額派不足輒借支太倉支不足乃令原供司府依數增派於是天子疑其乾沒下禮部問狀責光祿寺具疏上上復降旨詰責乃命御史稽覈月進揭帖二月之間省銀二萬一千餘兩自是歲以爲常經費亦稍省矣穆宗朝少卿李健奏十事傳帖印信防姦欺一燕享規制二服制未及大祥罷張飲設樂三寶坻縣魚鮮歲辦一次薦新四清器皿五杜冒支六停畜飼獅羊七革回內差常數外隸籍本寺者八趣貢夷出

境九樽節庫銀十上皆可之停止進獻承天府香米諸物外域珍禽異獸罷寶坻採取魚鮮薦新上供具領於光祿寺毋奏遣內臣著爲令革太常光祿廚役二百五十名及內府玉器諸官匠冒給光祿酒饌者江陰歲例進新子鱗魚萬觔令折半從內官監太監李芳請停徵加徵白熟細粳米四千五百石白青鹽三萬觔命自後歲派依成化弘治間例米一萬一千五百石鹽十三萬觔御史王宗載請停免加派部議果品原額一百七萬八千餘觔續加派銀九千八百餘兩供應牲口原額銀五萬六千三百餘兩續加派銀二萬四千二百餘兩



以原額送光祿以加派者歸戶部其後神宗立詔免之永樂時尙膳監有房牧地十三頃餘置司牲官吏歲費數千金至是光祿卿請以羊供寺用罷官吏御史又言廚役額設三千二百五十人而大庖執事者七百人役占買閒者其衆請覈去之皆以太監孟冲言不果行寶坻縣銀魚廠設自永樂時隆慶二年停革止令光祿寺估價以供廟享上用若專差坐採又徵其稅則自萬曆二十八年始世宗末年歲用止一十七萬兩穆宗裁原額二十四萬一千者爲二十二萬而歲用止一十五萬五千餘兩蓋愈約矣舊制供應器皿工部歲造八千四百南京工部造三千六百總一萬二千件有不足題請添造萬曆初年歲用不及五千件時斷國者尙綜核諸司亦務節冗濫無侈費故歲用僅十三四萬兩視前爲最儉二十年以後漸增至二十六六七萬兩不啻倍時額設猶沿二十二萬兩餘具借之戶部太僕寺又十餘年歲額仍增爲二十四萬一千三百餘兩而歲用幾三十萬矣羣臣屢以節儉爲言並請裁養心等殿賞桌清還侵沒器皿皆不報熹宗免養心殿湯飯銀六千餘兩

工部四司營繕司掌工作分司爲三山大石窩爲都重城爲灣廠通惠河道兼管爲琉璃黑窯二廠



爲修理京倉廠爲清匠司爲繕工司爲神木廠爲  
甄廠爲山西廠爲臺基廠爲見工灰石二作虞衡  
司掌山澤採捕陶冶凡四方一切輸貢及各監局  
鑄辦統覈其出納分司爲寶源局爲街道廳爲驗  
試廳爲盛甲王恭二廠都水司掌川瀆橋道舟車  
織造衡量分理於外者爲泉牯河廠抽分諸差木  
司總理者爲通惠河爲器皿廠爲六科廊屯田司  
國初設以理軍食其後耕屯悉隸有司所掌上供  
併監局柴炭與山陵之事分司爲臺基柴炭廠爲  
外差易州山廠三山大石窩專掌燒造各工灰石  
之事灰料馬鞍山燒造都重城司修理城垣白城

甄取之大通橋甄廠臨清廠燒造年例甄一百萬  
枚貯甄廠蘇松七府造金甄並徐州採辦花石見  
鼓樓下備用鑄鐘二廠琉璃黑窰廠一差兼領之  
題請燒造無定數修倉廠每年小修屬工部大修  
本司掌之清匠司清理內府監局匠役舊制輸入  
工作主勾覈自收折色凡隸籍供應者胥屬內官  
矣繕工司國初囚徒撥工部搬運灰炭嘉靖間准  
納工價收貯節慎庫徵納猶在繕工萬曆年刑部  
請自徵第歲額解繕工銀一千七百一十六兩爲  
上供需而已小修無專職萬曆末始歸本司神木  
廠掌收材木在城外便灣廠輸運儲積多於山臺



二廠山西大木廠儲材爲造作之場與神木廠皆  
國初舊設臺基廠係後中設就宮殿造作所便輸  
運凡營建定式於此廠內甄發地一方爲規畫之  
區與山西大木廠皆居內監監督從外遙制而已  
見工灰石作無專差工止則已寶源局司鼓鑄街  
道廳司街道溝渠浮橋之事驗試廳嘉靖二十八  
年建盛甲王恭廠一差兼領盛甲廠卽鞍轡局王  
恭廠天啟中燬改建名安民廠掌修造軍器所屬  
有軍器局通惠河掌漕政兼修通倉并灣廠收發  
木料灣廠所以抽分竹木者也器皿廠造光祿寺  
上供太常寺壇廟之器九陵及婚喪典禮諸器物

其屬爲營繕所匠作凡一十有八種曰木曰竹曰  
桶曰蒸籠曰捲胎曰油曰漆曰鍍金曰貼金曰染  
曰索曰縲曰銅曰錫曰鐵曰絲畫曰裁縫曰祭器  
六科廊在內府六科之旁專掌諸齋賞勞并內廷  
典禮之取給督官作匠役成造備賞艾思院馬槽  
廠隸焉易州山廠掌燒薪炭以供內府借薪司光  
祿寺之用宣德五年置廠平山以都御史董之正  
統初遷沙峪口一作沙魚口以工部尙書或侍郎督廠事  
景泰四年移置滿城縣一作清縣西十里天順元年以易  
州林木蒼鬱便採移置州城西北二里設部公署  
於中環以土城八府五州分治次列皆南向部總



出納府州縣佐貳官分理之役民歲億萬計內府十二監曰司禮曰御用二內官曰御馬曰司設曰尚寶曰神宮曰尚膳曰尚衣曰印綬曰直殿曰都知四司曰惜薪曰寶鈔曰鐘鼓曰混堂八局曰兵仗曰巾帽曰針工曰內織染曰酒醋麪曰司苑曰浣衣曰銀作總謂之二十四衙門司禮監凡古今書籍名畫筆硯墨綾紗絹紙各庫貯有提督經廠道佛藏書板皆有掌司皇史宬六科廊皆有監簿御用監造御前陳設屏几玩好之器轄洗白殿內官監領十作米鹽庫營造庫皇壇庫裏水窖金海諸處十作曰石作曰瓦作曰搭材作曰土作曰東

行曰西行曰油漆作曰婚禮作曰火藥作凡國家營建之事董其役御前所用銅錫木鐵之器日取給焉御馬監有孳馬象房掌司金鞍作裏草欄中府天師菴三草場隸之司設監掌鹵簿儀仗圍幕褥墊諸宮冬夏簾蓆幔雨袂頂傘之類尚寶監掌御用寶璽寶色銀六十餘兩取之工部虞衡司神宮監掌守九廟尚膳監掌造辦奉先殿早午晚供養饌品乾清諸宮殿宮眷月分廚料凡御前近侍內監及外之殿閣中書畫士桌銀全桌折銀十兩有奇半桌半之光祿寺前期封進每月晦依欽賞數給之遇大典禮天子陞座督光祿寺茶飯鐘鼓



司九奏之樂主納外進鮮品天啟以前三時御膳皆司禮監掌印秉筆掌東廠者共之崇禎時改由監共尙衣監掌造御用冠袍烏襪印綬監掌古今通集庫並鐵券誥敕符信直殿掌殿庭灑掃都知掌駕前警蹕惜薪司掌宮中柴炭及二十四衙門山陵諸內官柴炭寶鈔司作房七十二間竈皆邱突所用稻草灰木香油由工部辦正德間劉瑾改外新廠爲辦事廠榮府舊倉地爲內辦事廠鐘鼓司掌宮中迎導御駕作樂戲劇之事混堂司職司沐浴兵仗局掌造軍器火藥局屬之供宮中鐵鎖鑰鎚鉗鉞剪宮醮日月蝕法器之類亦謂之小御

用監巾帽局掌內官長隨內使小火者平巾官帽每冬初於節慎庫領靴料銀多至十餘萬兩針工局掌內官長隨內使小火者冬夏服歲一遞散每六年一散鋪蓋凡宮中法事揚幡桌衣皆共焉內織染局掌染造御前及宮中應用絹帛外廠在朝陽門外澣濯袍服之所又有藍靛廠在都城之西亦本局之外署也酒醋麪局職掌內官各宮食用諸物司苑局司蔬果藝植之事浣衣局署在德勝門官人年老罪廢者居之銀作局造金銀針杖錢豆葉諸物又造票兒銀自十兩至一錢制方印字皆以備欽賞外則如御酒御藥御茶諸房上林苑



監林衡蕃毓嘉蔬良牧諸署太醫院各以其職供上用國初十一監二司六局有平陵神宮監其御用都知監寶鈔混堂司浣衣銀作局皆後增設宮中設六尚曰宮儀服食寢功各總四司尚宮之司曰記言簿闡尚儀之司曰籍樂賓贊尚服之司曰寶衣飾仗尚食之司曰膳醞藥饎尚寢之司曰設輿苑燈尚功之司曰製珍絲記復設宮正司以行其賞罰戒令焉凡採造之事累朝侈儉不同大畧始於宣宗繼以憲孝武至世宗神宗而極採辦事目繁瑣徵索紛紜其在京師役之最苦者曰舖戶用最繁多者曰柴炭事之最艱且鉅者曰採木曰

坑冶歲造最大者曰織造曰燒造其間爲民害者率由中官部司之差次之有司之程課又次之

明初內供之物胥任土作貢曰歲辦不給則官出錢以市曰採辦其後本折兼收採辦愈煩於是召商置買有舖戶之役始給直以時無他費受役者未病後率輸物於官乃給以直有終不給者而中官鋪墊費不訾所支不足相抵民以不堪初太祖令每市物視時估率加十文以利民所司請令民採辦青綠飾東宮公主府上以役民勞費已之建西宮所司請下湖廣買銀硃水銀諸色上亦不許永樂中有司歲辦物料里長領官錢不以俵給非

土所產民輒破產購之而軍器所需賦諸民尤夥成祖初斥言採五色石者又以溫州輸礬勞民罷染布色然內使之出始於斯時四年命內使李進採天花山西進詐傳詔旨以採辦爲名營私害民事覺逮治上頗悔之蓋工役繁興徵取稍急矣仁宗立諭工部曰古者土賦隨地所產不強其所無比年丹漆石青之類所司不究物產之地下郡縣槩徵之郡縣逼迫小民鳩金幣詣京博易輸納商販之徒乘時射利物價騰踴數十倍計民所費朝廷得其千百之十一今宜量地產平市之又令凡山場園林湖池坑冶若果樹蜂蜜曾經官採官設

守禁者悉與之民有自南京來奏事者時上已病召至榻前問道經百姓所苦罷徐州諸處徵買羊毛宣宗罷各處牘辦金銀抄造紙劄坐買靛青內官內使向遣市物於外者每物置局拘集勞擾悉取回又馳驛諭止造辦紵絲紗羅毳段香貨銀硃金箔果品海味非歲額而科擾者罪不赦副都御史戈謙言有司給買辦物料價十不償一展轉尅減上下糜費至於物主所得幾何名爲買辦無異空取自今非軍需急用之物乞且停止上嘉納之諭工部曰比聞差催柴炭顏料工料有酷暴傷人者事有不可已亦當從容令措辦若酷暴逼迫爲



朝廷斂怨失人心矣宜察懲之改京師買辦沙魚  
於近海郡縣罷買製御用朱紅戩金龍鳳器物料  
庫藏之不足者以陝西艱食罷民運茶及採紅花  
茜草內使有言採中條山膽礬者勿聽數以歲災  
罷免山東湖廣陝西順天蘇松浙江買辦諸物除  
減綿竹縣歲納鹿皮又令省減供用庫歲用香蠟  
銀硃等物戒有司毋得扣尅太醫院奏尙衣監辟  
蟲香請令禮部遣使福建支官鈔收買樟腦甘松  
諸藥物二萬觔上曰此非急務其移文不必遣並  
減十之七三年冬以山東泰安州稅課局大使郝  
智言悉召還所遣官敕自今更不許輒遣四年敕

部院比聞中外奸弊紛然嗟怨盈路皆由爾等不  
體朕恤民之心遣人在外肆行剝削朝廷取用徵  
辦動輒差官於州縣坐併又有爲之鷹犬漁獵百  
倍箠楚煩煩不勝其毒自今非有重大急務勿輕  
遣明年又敕部院除造軍器及軍需買辦盡行停  
止撤泰和縣採寒水石中官令民自採納然是時  
寬免之詔屢下內使屢敕撤還而奉行不實在外  
宦官輒名採辦虛取於民六年上誅袁琦阮巨隊  
等十餘人患稍息九年二月敕兩畿河南山東西  
買辦銅鐵諸物秋成之後減半解納遣去官令回  
部至六月以兩畿河南江西旱蝗復敕停辦英宗

立罷諸處採買及造下西洋等處船木並營造物料撤差員放回軍夫役匠元年敕省諸冗費順天眞定保定府州縣原領官買長生牛羊一十二萬餘隻春秋每羊取毛二觔輸京至是免諸鳥獸惟鹿天鵝貢生者餘悉估價輸鈔二年敕造軍器物料應天府支官錢收買勿派外郡四年以歲荒罷採買南京供用庫茶蠟諸物洪永以來民間歲造弓箭多有逋欠至是始核減八年上以買辦擾民始令於存留錢糧內折納就近解兩京舊例內府所用油椿槐木石磨歲一易每物費至二三百兩景泰五年以都給事林聰言始命五年一易天順

時內官奏請依永樂宣德例差內外官之西洋雲南諸處採買黃金上命以雲南歲辦差發銀折收金應用成化時以邊急停遼東東寧衛卒採辦人參十年給內帑鈔三百三十一萬貫償大興宛平二縣舖戶買辦物料直凡內府繕造多令二縣採買率無見直積久乃得支鈔其後買辦日多價直益貴自給鈔始十四年停免浙江收買花木自洪熙時始令宦官鎮守邊塞正統十一年復設各省鎮守又有守備分守內官布滿天下官苦於挾制民困於徵求購書採藥之使相繼分出搜取珍玩靡有孑遺抑賣引鹽私採禽鳥糜官帑納私賂動



以巨萬太嶽太和山降真諸香恒三歲用七千觔者至是三歲用香一萬三千八百四十餘觔蠟二萬三千四百三十餘觔內府各監局派辦物料有加至五六倍者孝宗立頗有省減甘肅巡撫羅明言鎮守分守內外官近因有傳奉不次之擢競尙貢獻各遣使屬邊衛搜方物名以採辦實扣軍士月糧馬價或巧取番人犬馬珍奇又設膳乳諸房僉廚役造酥油諸物比起運沿途騷擾乞一切罷之詔曰可五年停止寧夏採豹先是正統時令產顏料處歲於存留糧內折徵六年葉淇言歲災乏糧而在京顏料存積乞損坐派之半從之初各監

局市物料京縣舖行貸之富戶利給鈔蓋時直猶浮於物也自尙書姚夔請令官估民無所利而東南歲辦油麻銅鐵之類皆出額外至如烏頭牽牛諸藥黃腰木狗諸皮馬牙黃熟黃速速香動以萬數而織染窰冶造作淫巧糜費不訾監局主收皮張不中則撞碎退出解送物料者負累冤苦鎮守宦官爭爲進貢南則禽鳥花木鮮品奇珍北則馬疋果品掇取於民求容悅而太監李廣以黃白修煉符籙左道爲熒惑權傾中外僕隸厮役傳陞官職名器亦多冒濫矣武宗踐阼劉瑾張永相繼用事漁利無厭鎮守隨地大小貢銀萬計差多寡更

易之設邊關內臣司香守備皇古諸名色不一率假以進貢無名之徵百出歲辦多非土產民困於賠納浙江鎮守收買果品捕羅禽鳥裝載輸送徵取商人脚價東南騷動陝西太監廖堂怒按臣裁抑先後奏降劉天和王廷相爲縣丞諸布政司來朝各陳言進貢之害多不省世宗初裁革南京內府各監局官減內府供用庫各直省歲辦依弘治例視正德十省八九然是時營建齋醮之事興採木採珠玉寶石採香之令旁午吏民奔走應命日不暇給南京給事中游震得言南京城坊居民自里甲正徭外復有各項舖戶辦納南京內府諸監

局物料有司不時給價仍令分隸應役故占籍萊及數年富者以貧貧者以徙順天府府尹雷禮言永樂間取浙西富民實京師號廂民今廂民所供物視給直常數倍非制宛平大興殷實人戶供辦上用物原非本縣徭役宜平準其直以時給與按嘉靖初御用監供用庫歲派黃蠟止八萬五千觔白蠟四千觔末年黃蠟增至二十餘萬觔白蠟十萬觔外又有召買有折色視正額不啻三倍初年以廣東進香多費罷香貢二十九年供用監徵內用沉香七千觔降真香六萬觔沉速香一萬二千觔速香三萬觔海漆香一萬觔黃速香三萬觔又



分道遣購龍涎香十餘年未獲令於沿海通番地方訪之中間閩廣巡撫各進一餘兩而採取者卒無所得使者以請海舶入澳納龍涎香乃得交易商貨比採取一二以進則以向所進香非真督辦益急四十一年大內火中人盜香以出尚書高燿陰市之伺聖節建醮日上八兩遂大稱旨命給直數百兩加太子少保是時廣東福建所進漸廣上益給銀廣買并買黃金既以戶部進龍涎香數少又所進金色不純下詔詰責尚書高燿惶恐謝請更進足色金千兩贖罪復進香一觔八兩云得之民間實非民間物也初上定方丘并朝日壇用玉

爵各因方色求紅黃玉不得詔購之陝西邊界撫臣奉詔購之天方國土魯番諸夷皆無產者回回館通事撒文秀言二玉產於阿丹去土魯番西南二千里其地兩山對峙自爲雌雄有時自鳴請依宣德時下番事例遣使求之將必可得上然之孟密有寶井產寶石下詔採取雲南巡按劉臯疏諫不聽三十二年取太倉銀十五萬兩進承運庫辦金寶珍珠又命戶部順天府購珍珠寶石又令求貓睛祖母碌石綠撒孛尼石紅刺石比阿洗石金剛鑽米藍石紫英石自是雲南連進寶石戶部購進貓睛祖母碌石及黃白玉珍珠上每少之蓋督

責所求益精部臣復進綠玉三皆盈尺上仍令購白漿水碧二色玉以進又以大小珠一函及甘黃玉刀鉞一具示尙書高燿令依式廣購已兩月上遲之會又命進黃金四千兩燿懼乃先進大小珠四等千五百餘顆上以未足原數且無甘黃玉疑燿吝費命急購會晏駕乃止隆慶初言者請省革諸採辦部以爲驟加於民則民驚疑若沿襲旣久民已習服且時異勢殊不能盡援嘉靖初年之例太監滕祥率以嘉靖末年爲故事與言者相持雖有節省之詔所裁減者少矣時以酒醋麪局商兼辦內官監寶鈔司稻草言者請分其役爲二歲審

貧無力者更之二三年上諭言官條議恤商諸政工部覆稱言官所陳大約僉點之初在清冒濫選充之後在照時估發預支時給領禁需索均肥瘠今商人隸本部者不過五十餘名凡言官所陳畧已施行不稱困也惟是赴監輸納橫索多端剝膚椎髓非臣等所敢知在皇上加之意而已若年例加增之數亦請裁減以信前詔上是之穆宗初政欲崇節儉繼乃踵世宗之失廣求珍異侈嗜翫服御器用鏤金雕玉靡敝無紀神宗繼世政在輔臣額外之費多所裁抑內承運庫太監崔敏請買金兩珠石疏下內閣張居正言前奉旨停止今忽有此



舉是詔令不信也封還敏疏事遂寢又奏免織染局加派綾羅藍靛諫增雲南歲進金一時諸臣各得以職掌執奏太監馮保請覈減造辦或減半或減三分之一然帝故黷貨元年卽詔增黃蠟二萬五千觔採香數萬觔數年之內有旣減而復舊者有自少加多者有昔無而今添者比輔臣卒天子益無所顧忌開採議興召買益衆潞王婚禮責辦金三千八百餘兩寶石八千七百枚珍珠八萬五千顆珊瑚珠二萬四千八百顆部奏萬曆六年至今金花銀五百萬兩外增進承運庫買辦金珠銀九十萬兩按會典親王聘禮金止五十兩珠止十

兩今不止數倍於前內府庫具有額設未增之先未嘗告匱何以今反不足若細加察核必有不係買辦正支者矣旣銀作局奏慈寧宮鍍造黃金三千二百兩部臣請視嘉靖十七年慈慶宮例減爲一千五百兩不聽五公主婚禮銀作局取金戶部戶部言自六年添進金花銀採買金珠固取給壽陽長公主以下婚禮况嘉靖三十三年三十五年公主下降亦嘗取金不過三百兩今多至二千三百餘兩珠寶稱是太倉之積非如流泉其何能支得旨減三之一當是時諸臣以珍寶異物估直不當輒降罰給事中曲遷喬言內庫受四方之貢備

用有定數相沿二百餘年未聞不足嘉靖隆慶年間或有召買數亦不多今供用諸庫香蠟銀硃銅錫油漆綠緋存餘新解奚啻充溢香蠟焚燒有時銅錫油漆製造器物用堪二三十年絲綿溫暖柔細亦堪數年顧動以缺乏爲詞不知器用貯何所給何人也上用冠頂袍服嘉隆二朝至萬曆七年歲用額止六百六十萬至十年遂加至二千一百有奇十七年後以漸增加乃四倍之南京內官監成造幪金饜桌饜榼檠燈圍爐工料二十二萬六千七百有奇分四運兩年造解二運時京師舖戶旣徵免行錢仍責一切供具二十六年下雲南大

理採石李廷機條議軫恤四事一曰行帶辦之法一曰蠲可免之役一曰速給價一曰禁需索胡圻亦言各廠內官多至三四百人人人攘臂攫奪橫索鋪墊有竭一廠額供不足充一廠鋪墊者宜定之以額若各衙門年例柴炭須從改折物料宜解本色京城內外市販之家宜定爲三門九則納銀募熟諳之人應役其後上亦知內供商役之苦以爲偏累疲民可憫然僉商令下營免者多上惟狗中人之意僉十脫九故京師之民一聞僉報如牛羊赴死殼鯨悲鳴不堪聞見而官司密勾如緝姦盜羣臣連章陳論皆置罔聞而解戶包攬隱匿亦



有至十年不解者上下扞格幾四十年延至熹宗其弊猶存十庫商役以珠寶草而兼充之爲累尤重而當時辦串五細絲黃白長荒絲增舊數倍儀仗物料亦不下數萬金給事中周希令巡視庫藏見牆巷堆積硝黃如山歲久爛廢詢之曰商人缺鋪墊棄之而逃矣比閱在庫諸物皆年遠不堪用於是希令請行量折以爲恩詔故有改折之言已頒示天下何宜行而久不行也

國初令軍衛自設抽分場收貯柴薪月給禁軍孤老又令都督府歲供柴炭役邊軍採之邊關宣宗初以武陽侯薛祿言免征是時邊木已罄又嚴伐

木之禁於是令諸衛歲納銀二萬餘兩後府招商買納惜薪司賦棗山東河南八十餘萬觔爲宮中香炭楊士奇奏減其半弛西山樵採厲禁憲宗減內外諸司歲派柴炭之半放免惜薪司擡柴夫存二千名減易州諸廠採運人夫三千名武宗初經畧孫交論邊衛徵納柴炭之失以爲邊關樹木稠密以扼敵騎資防守旣禁採伐復徵其價不及數至均之屯軍名爲禁之而實徵之無名之稅豈盛世宜有是時召買商多得罪下獄追餘利正德二年後易州山廠歲增柴炭一千四百六萬餘觔直三萬五千六百餘兩惜薪司弘治間止派一千八

百一十三萬觔正德末年加派一千一百一十萬觔山廠侍郎奏五年以後依弘治十年以前數自本廠辦添派數令工部區畫世宗令惜薪司柴炭係正德時新添者折價給散每柴萬觔計正幫腳價銀四十七兩內使月給百觔實直銀一錢二分止四分之一於是部議令折價者百觔給銀二錢五分緣邊隘口山木旣禁伐令民自廣昌蔚州靈丘諸處燒採於易州山廠召買姦民不利遠涉盜採紫荆倒馬二關亦禁山也嘉靖初乃議令易州廠發銀給以公文賫赴大同大同給公文傳送以防姦僞始時收受之際每百觔加濕耗一

十五觔後倍之而中官設重權恣取於正數外暗加數倍侍郎楊廷儀以其太重請明加一倍而暗加者猶不盡去至以三年起運不足抵一年上納尚書李鏊於是議正耗相准而重權乃至以四萬爲萬給事中吳嚴謂未有鏊議之先主收者雖曰多取猶未有定數自此旨下得以藉口耗加於正子過於母鏊及廷儀不得辭其責矣先是州縣官運柴炭於京師者爲攬頭逋負貽累運官輒至貧困以死於是嘉靖五年上命州縣供柴炭京師者亦召商買納隆慶元年改後府柴炭商屬兵部山廠歲總柴價三十餘萬兩御用紅籬炭七十萬觔



惜薪司歲用木炭六百萬觔弘治年加派一萬觔  
隆慶初用白炭十萬觔減黑炭數補其直凡齋醮  
焚燎用楊木長柴宮中膳房用馬口柴內官關領  
則用片柴山廠外有北廠南廠新西廠新南廠皆  
貯柴炭之所萬曆十年二十六年惜薪司先後增  
銀一萬八千二百兩以缺官銀協濟惜薪司並外  
四廠柴炭皆供內廷大木炭每廠銀一千八百七  
十五兩內柴每廠銀一千二百兩外柴每廠銀一  
千兩三錢固已足用但內監管理人衆雜色人役  
日增故司中動稱急缺自萬曆三十一年後掌廠  
者自得徵比諸商酷刑恣索乃至杖殺指揮由是

人視惜薪司爲陷穽矣紅籬炭用木三種曰青信  
曰白棗曰牛筋皆曰甲木產金水口去紫荆關六  
十里當架礮藩籬禁地萬曆十七年主事張新請  
就廠後隙地種植炭自易州燒成運至紅籬廠按  
尺寸鋸之長尺徑圍二三寸編小圓荆筐承之筐  
塗以紅土故名香匠造香餅獸炭又造如神官武  
士者高三尺許金絲粧畫惟面手仍炭質名曰絲  
粧歲暮對植諸宮門過二月乃撤採煤舊止奉內  
旨監馬鞍山黃樹園官窰一處後王朝蔓及山西  
激變窰民朝復誣奏窮治之

太祖都金陵軍士採木浮江而至爲利便成祖遷

都北平繕治宮殿工役繁興永樂四年遣尚書宋禮如四川侍郎古朴如江西侍郎師達金純如湖廣副都御史劉觀如浙江僉都御史史仲誠如山西各採木明年宋禮言有數大木不藉人力一夕出大谷達於江天子以爲神名其山曰神木山遣官祠祭中允周翰劾師達苛虐云向者上念民勞議罷役達言民樂趨事乞不罷致激良民從李法良爲叛十年復命宋禮採木四川連歲營建大工不一採木爲民厲甚仁宗立已其役第令已採者運送至京旣又以東作方興並令緩運先時採木諸臣率虛奏木數比起運倉卒求足督民急酷上

慮運木內臣復蹈前失遣副都御史戈謙巡視之諭之曰虛奏之數已宥不問苟勞人再採不奉令者擒治之宣德元年修南京天地山川壇殿宇復命採木已因湖廣旱災已之明年湖廣守臣乞免採竹木報可明年工部請遣官之山西採木上曰民方務農姑緩明年採大木湖廣已諭工部曰去歲是處薄收湖廣爲甚比工部採辦木竹科買諸物動以萬計何不爲國家愛惜物力而勞擾如此也其酌省之明年二月罷遣採木軍夫歸農罷徽州採木有請禁止商販者上曰天生五材民並用之惟承奉官府廢民生業朕不取也明年罷湖廣



採木民運諭工部勿妄用廠貯材木工匠斲小大材者罪之尙書吳中爲工部最久勤於蓄材不甚恤民力宣宗每以勿擾民諭戒之嘗以私遺太監楊慶官木作私第上登城望見訊得其實下獄尋釋內官管木廠者亦多盜市官木六年令山東江西採木送淮安修船上命減其半九年中復請禁民採伐湖廣及蔚州山木上不聽弘治時發內帑修清寧宮免征派并停止四川採木正德時採木湖廣川貴命侍郎總督又命侍郎督運時永順宣慰彭明輔進大木五百餘有圍一丈四尺長五丈者嘉靖元年革神木千戶所及衛卒遣內官之眞

定邸烙木植十一年御史郭弘化言井居東方其宿爲木頃者彗出於井土木繁興所致上怒黜爲民二十年宗廟災選官分往湖廣四川採辦大木後二年復遣官湖廣提督之向時採木大臣四川一湖廣貴州一事權不相統攝恒牽制至是乃以一人居荊州兼轄之又遣官覈諸處遺畱大木淮撫奏五河縣大杉圍一丈五尺長六丈六尺湧出泗水沙中殆屬神佑遼王獻大木七株銀二千兩襄王二十株三千兩各賜獎諭宣慰使彭明輔彭翼各獻大木三十株麗江土知府木高獻木植銀三千八百兩詔進階有差當日郡縣有司以遲悞

學苑類稿  
大工逮治禡黜非一趣辦甚亟民不堪命其並河諸州縣尤苦之三十年江西礦稅監潘相請採廣信封禁山內外臣力爭不報

坑冶之課爲金銀爲鉛爲鐵爲銅爲水銀硃砂青綠爲珠而金銀礦最爲民害大將軍徐達既下山東近臣奏興舉銀場太祖曰銀場之弊利於官者少損於民者多况今凋瘵之餘豈可以此重勞民力其後府軍前衛校丁成言河南陝州地有上下絞上下黃塘舊產銀礦前代皆嘗採取歲收其課上日土地所產有時而窮歲課成額徵取無已言利之臣皆戕民之賊也臨淄縣丞王基乞發山海

之藏以通寶路上黜之成祖斥河池縣民言採礦者仁宣仍世禁止填番禺坑洞罷嵩縣白泥溝發礦二祖仁宣蓋未嘗沾沾坑冶之利也然福建銀屏山銀場局置爐冶四十二座始於洪武之十九年遞年增辦課銀二千六百七十餘兩浙江亦有場局歲課二千八百七十餘兩永樂間遣官湖廣貴州採辦金銀課旣慮歲辦有不實更遣御史中官往覈又開煎福建浦城縣馬鞍等坑三所設貴州太平溪交趾宜光鎮金場局葛容溪銀場局不產金銀坑冶亦屢有革罷而福建歲額增至三萬二千八百餘兩浙江增至八萬二千七十餘兩宣



宗立銀屏山副使奏本場納銀季五百七十兩自  
永樂中遣官牘辦數倍其數季二千七百餘兩民  
貧逃亾乞仍舊額上曰遣官牘辦正欲察其姦弊  
乃反倍增其課虐民甚矣其廉減之然宣宗時福  
建增至四萬二百七十餘兩浙江增至九萬四千  
四十餘兩不足則督坑首冶夫賠納英宗卽位下  
詔封坑冶撤牘辦官民大蘇息顧是時雖免牘辦  
而歲額猶未除沿六七年始奏革未煎鉛礦在庫  
每爲盜賊焚劫戕守吏姦民爭開坑穴私煎相殺  
傷於是嚴其禁令民尤易犯法八年特下詔原之  
猶未已於是御史孫毓福建叅政宋彰浙江叅政

俞士悅各言復開銀場則利歸於上而盜無所容  
浙江按察使軒輓獨以爲不可上是輓言已而給  
事中陳傳復請開場中貫助之以請乃命侍郎王  
質往經理定爲福建歲課銀二萬一千一百二十  
餘兩浙江四萬一千七十餘兩減於宣宗時然視  
國初已十倍時正統九年也又分遣御史提督內  
外官屬供億過公稅民復思爲盜惟雲南銀坑以  
沐昂言仍停止而侍郎焦宏勘增福建銀爲二萬  
八千二百五十兩十二年所進僅一萬三千四百  
兩不能及額上命補辦御史先後疏諫不從當是  
時民困而盜愈衆鄧茂七葉宗畱之徒流毒浙閩

至十四年始戡定方寇盜肆訖銀課之令格不行  
及寇平復令御史監生內使牘辦浙閩銀場景帝  
嘗封閉隨以盜礦復開處州指揮王瑛請依歲辦  
數不從歲辦者洪武中元額也永樂宣德新增之  
數謂之牘辦天順四年命太監羅永之浙江羅珪  
之雲南少監馮讓之福建內使何能之四川各銀  
場牘辦銀課浙江三萬八千九百三十兩雲南十  
萬二千三百八十兩福建二萬八千二百五十兩  
四川一萬三千五百一十七兩總一十八萬三千  
有奇既戶部奏福建古田福寧銀場採礦煎銀數  
少欲從民便驗糧辦納古田一千二十五兩福寧

一千五十兩上命減半成化中浙江福建各差內  
官四川雲南令鎮守內官提督採辦先以福安縣  
銀坑礦盡派課於民至是新開上平坑以足之湖  
廣舊有金場時仍命淘煎武陵等十二縣開二十  
一場歲役民夫五十五萬有奇民之傷於蛇虎歿  
於水者無算得金僅三十五兩於是復封閉令有  
司易金千兩進用而浙江銀礦亦多以缺額量減  
雲南自永樂十年始開停止於英宗初政天順三  
年復開辦銀五萬二千三百餘兩次年增至一十  
一萬二千三百八十兩延至天順六年纔足乃以  
停止成化三年又復天順三年之數官司摘軍餘



為礦夫計月追銀不足則扣賣軍糧以益其數八年鎮守太監錢能巡按胡涇先後以為言得減半踰數年復依天順六年數徵收巡撫吳誠黔國公沐琮疏爭不聽弘治元年始減二萬兩減定處州府歲課一萬二百三十七兩有奇溫州府泰順縣六百四兩有奇以鎮守太監陳道請免建安縣銀課一千罷浦城縣陳伯廢坑銀冶以歲課派之丁糧補納十三年雲南巡撫李士實言雲南九銀場各衛以礦夫口糧賠納歲三萬四百三十兩日礦夫口糧餘丁三五人充一名歲賠二萬一千九百四十五兩日夫丁乾認今荆山窩村廣運寶泉四

場礦脉久絕乞免其課報可復革原設僉事於是令雲南歲徵差發銀八千八百九兩五分折買金一千兩足色二分九成色三分八成色五分與年額辦金六十六兩六錢零並餘剩銀解部送承運庫先後封閉四川密勒山銀場山東胡陵山礦穴中使請取麻峪山銀礦巡撫執奏詔止之武宗初從內官秦文等奏復開浙江福建諸郡銀礦既而浙江守臣奏礦脉已絕詔令布政司歲進銀二萬兩以代銀課劉瑾誅乃止副千戶王玉以報獻銀礦不實坐斬世宗詔封閉大理府新興等礦場又以山西流民盜木集山神堂菴諸礦洞令巡撫嚴

禁錮守之嘉靖十五年武定侯郭勛請開薊州瀑  
水洞房山縣民奏開水洞山浮圖峪諸處銀礦皆  
從之又命採雲南河南礦銀十九年罷各處礦場  
三十四年復遣官四川山東河南開礦上令訪未  
開之場以顯金玉露形經旨時山東保定山西河  
南四川雲南諸處所在進礦金銀定盜礦律浙江  
江西礦賊劫掠徽寧設兵備之隆慶初罷薊鎮開  
採直隸浙江江西諸處礦山立石禁止萬曆十二  
年後姦民屢以礦利中上心諸臣力陳其弊上雖  
從之意殊怏怏也二十四年張位秉政府軍前衛  
副千戶仲春請開礦助大工從之命戶部錦衣衛

官各一同春開採給事中程紹工楊應文言嘉靖  
二十五年採礦至三十六年委官四十餘防兵一  
千一百八十人費約三萬餘兩礦銀纔二萬八千  
五百兩得不償失不聽時開採之端既開廢棄自  
望獻礦洞者日至初猶部臣董之其後竟領以原  
奏官於是錦衣衛百戶陸松鴻臚寺隨堂官許龍  
順天府教授馮時行經歷趙鳳各言礦事錄事會  
長慶百戶吳應麒言山西夏邑礦指揮王允中言  
青州沂水礦百戶汪文通言沂州礦指揮郝承爵  
言費勝縣礦文通言沂州礦有紫白黃三種爲天  
下第一紫者尤佳承爵亦謂費勝縣石井大小銀



場皆第一指揮劉鑑言栖霞招遠等金礦指揮馬清言文登縣礦千戶趙良將言沂水蒙陰臨朐礦指揮陳永壽言河南礦千戶鄭一麟言橫嶺路礦尙書楊俊民言真保薊易永平開礦妨天壽山脉不聽命戶部郎中戴紹科錦衣僉書楊宗吾開礦汝南太監王虎奏礦務請招礦盜開採而紹科首進礦砂銀自後進者踵至當是時天子命內官王虎王忠往畿內張史往山西曹金往兩浙趙欽往陝西陳增駐山東高竄領福建楊榮辦雲南丘乘雲駐四川李敬攝廣東郝隆劉朝用來池州陳奉領湖廣魯坤開彰德衛輝大璫雜出諸道紛然言

利諸臣踵至天子欣然聽納下令如流水一時民之富者編爲礦頭貧者驅之墾採若刈草菅已及時各巡撫守臣奏諫皆不報內官武弁劾文武大小守臣沮撓者率降旨切責逮問魯坤之疏曰府縣官於臣宜有所轄陳增之疏曰一應事機聽臣便宜行事且得舉刺以示勸懲給事中程紹疏論之以爲設官以來典制昭然未聞內官而轄有司以有司而牽制於內官者也知府知縣陛下授以民牧之寄舉刺者問其操履治才與百姓有無相安而已治礦之效不效何與哉以陛下之臣工而屬於闔寺體統謂何山西巡撫魏允貞疏諫開礦

言尤切直其畧曰開礦之役獨二三武弁言其利耳豈在朝諸臣皆不達國計者耶竊計礦非自今始天地開闢以來宜卽有之未聞古聖帝明王開之碩輔良臣請開之也且陛下亦安用開礦爲天下帑藏陛下之帑藏天下財賦陛下之財賦何求不得而以是爲利况今水旱洊臻烽火時告天鳴地震流星無度小民嗜利礦徒作姦一旦內外有事臣愚不知所終又言陛下不以待宦寺者待諸臣不以聽姦宄者聽言官緹騎四出雷動豹號而不念礦使操利吮民膏血而不察金取於滇織造取於吳越秦晉珠寶取於海南日南不竭不止若

元老息影於深林小臣駢肩於輦下而畧不加省何以異於求金寶之心也河南巡撫姚思仁言臣巡行郡邑其間礦夫剝膚竭髓溺河縊樹不忍見聞因陳可慮者八並繪圖以進益都知縣吳宗堯奏太監陳增罔上營私益都止有鉛沙絕無銀礦增強之入銀已非法矣更強採者代納陛下所得十一而歸增私橐十九山東巡撫尹應元亦劾增二十罪忤旨奪俸逮宗堯下鎮撫司籍其家庭臣痛哭交諫皆不見省尋諸省併稅務於礦使未久復差稅使三十年上偶不豫召輔臣入諭罷礦稅翼日上安悔之諭已頒急追寢其事明年京師地



震閩蜀山陝宣府遼東連歲皆震三十三年湖廣  
山東廣東西復震至有陷城郭沈陸裂山者是歲  
十二月乃詔罷採礦以稅務歸有司釋礦稅在獄  
承天諸生蓋自二十四年武弁市猾奏請開礦禍  
延天下十餘年怨毒深積人心離散末年姦人復  
言開礦會上崩乃止天啟崇禎時屢有言開礦者  
初猶禁不行至崇禎十年從太監梁弘泰言令有  
礦州縣給照商民開採輸納登萊巡撫楊文岳疏  
爭上切責之由是言利者復紛紛矣金銀之礦皆  
有鉛洪武時濟南青州萊州三府歲役民二千六  
百六十戶採鉛三十二萬三千四百餘觔十五年

罷採成祖免廣西歲辦黑鉛二萬四千三百八十  
觔福建浦城縣言馬鞍等銀坑三所歲可得銀千  
餘兩鉛四萬一千餘觔發民開煎宣宗時廣東番  
禺縣鉛沙百觔煉銀四錢鉛二十觔發嵩縣白泥  
溝地得銀沙四千餘觔烹一月用人力二千七百  
得黑鉛五十觔得不償失命罷之天啟三年順天  
巡撫岳和聲請復灤州偏山鉛礦銅礦遵化鐵礦  
崇禎時楊嗣昌亦請開金銀鉛銅鐵錫諸礦誘散  
流賊時論非之帝頗採用其言鐵冶所置自洪武  
六年始時太祖未卽位募工卽湖廣鐵冶煉鐵資  
軍用至是置所十三歲輸鐵七百四十六萬七千

一百八十七觔江西南昌府進賢冶一百六十三  
萬觔臨江府新喻冶袁州府分宜冶八十一萬五  
千觔湖廣武昌府興國冶一百一十四萬八千七  
百八十五觔蘄州黃梅冶一百二十八萬三千九  
百九十二觔山東濟南府萊蕪冶七十二萬觔廣  
東廣州府陽山冶七十萬觔陝西鞏昌冶二十七  
萬八千二百一十觔山西吉州富國豐國二冶二  
十二萬一千觔太原府大通冶一十二萬觔潞州  
潤國冶澤州益國冶各一十萬觔既河南四川並  
有鐵冶十二年置長沙茶陵鐵冶其後廣平吏言  
磁州臨水鎮產鐵元時置官轄八冶歲收鐵百餘

萬觔帝曰朕聞治世無遺賢亂世無遺利官專其  
利必損於民今各冶鐵數尙多軍需不乏民生甫  
定若復設必重擾之杖而流之海外十八年以前  
煉勞民罷各布政司鐵冶山西交城縣產雲子鐵  
舊置冶貢鐵十萬觔至是工部言繕治兵器用雲  
子鐵非他處所產乃復設大通鐵冶武昌興國吉  
州豐國富國冶分宜冶皆復設二十八年上以庫  
內儲鐵已多詔令民自採煉歲課三十分之二三  
十年罷山西江西湖廣河南四川鐵冶凡九所明  
年以工部言暫開爐冶一年永樂時設四川龍州  
鐵冶仿定遼左衛例設遼東都司三萬衛鐵冶宣



德元年遵化仍開冶炒鐵景帝時辦事吏請復陝西寧遠縣鐵礦工部論其違法下獄給事中張文質以爲不宜塞言路乃釋之正德時遵化炒鐵減三分之一廣東置鐵廠以鹽課副提舉領其稅轄於巡鹽御史行鐵郡縣有走稅夾帶漏報者准鹽法科罪嘉靖三十四年開建寧延平諸府鐵冶萬曆九年薊遼總督巡撫奏遵化鐵冶廠課鐵二十萬八千觔計直不過二千七百餘兩而官吏軍役費逾萬金宜裁革以額課解部買鐵從之其銅課昉於國初江西德興鉛山有銅場歲浸銅得五千餘觔宣德三年添設二縣丞各一專領銅場免銅

場夫徭役明年歐陽齊言舊爲永康縣丞縣有山產銅礦上斥其妄言八年四川梁山烹煉紅銅軍民五百人人月支米三斗凡一月得紅銅三千三百餘觔不足償費命罷之正統十年減雲南路南州銅場歲課一千八十觔者爲五百四十觔崇禎時山西巡撫宋賢議於五臺採銅雲南布政使吳兆元亦請採銅礦寧羗峇陽產銅陝西巡撫汪喬年請開採鼓鑄其水銀青綠始廉州巡檢王德亨言家本階州界於西戎有水銀坑冶及青綠紫泥願得兵取其地以歸於朝太祖不許貴州大萬山長官司有大崖土黃坑水銀硃砂場局初設貴州

郡縣以之屬銅仁府宣宗初仍舊隸長官司正統三年革四川東川府會川衛山產青銀綠銅與外番接境禁軍民潛取正德九年軍丁周達奏雲南銀礦如大理之新興北涯洱海之寶泉楚雄之南安廣運臨安之判山及羅次銅錫青礫皆可採辦以益國課詔可交趾安州珠場局設自永樂中廣東珠池率數十年一採宣宗時有請內官採東莞縣珠池者繫之獄天順間一採至弘治十二年始採歲久珠老得最多正德九年又採珠亦已半老嘉靖五年又採珠小而嫩得亦甚少八年復詔採兩廣侍郎林富言五年採珠之役病死溺死者五十餘人而得珠僅八十餘兩天下謂以人易珠竊

恐今日雖易以人珠亦不可得也給事中王希文言雷廉珠池祖宗設官監守不過防民爭奪正德間逆豎用事傳奉採取流毒海濱陛下御極革珠池少監未久旋復又驅無辜之民蹈不測之險以求不可必得之物而責以難足之數非聖政所宜有皆不聽穆宗詔雲南廣東採珠寶神宗立停罷旣以諸王皇子公主冊立分封婚禮太后殯宮令歲辦金珠寶石復遣內監採珠廣東三十二年停採四十一年以指揮倪英言復開江西礦稅監潘相又請採秦和縣石膏巡按吳達可以爲石膏民



賴以生據言歲得萬石石直銀一錢官取其四計止得銀四百兩耳何重困此一方民爲閣臣沈貫繼論之皆不報

織造之事洪武初年命工部製太廟帝后服諸行省造鴛鴦戰襖五色文綺戰衣步兵開揆戰衣立神帛制敕局四川山西諸行省浙江紹興府皆有織染局置藍靛所於儀真六合之地種青藍以供染事未久諸局所悉罷又罷天下有司歲織緞疋有賞賚給以絹帛成祖復設歙縣織染局宣宗立工部奏內府供用紵絲紗羅九千匹請下蘇杭諸府織造命減其半先是永樂中令陝西織造駝氍

歲九百餘疋後續加五十疋正統元年叅政年富奏免續造之數又二年停造四年增置福建泉州府織染局工部奏令各布政司并直隸府州縣歲解紵絲羅絹編字爲號署提調官吏匠名天順初內織染局請遣官往蘇松杭嘉湖五府提督織造上供文綺七千疋未完又請別遣官加造七千疋以工部侍郎翁世資建議減半逮錦衣獄問謫衡州知府既而上竟罷其役始時命直隸浙江諸處織紵絲紗羅三萬四千七百匹中間詔減一萬六年仍復之孝宗時承運庫內官秦文奏乞長蘆鹽二萬八千引鬻於淮供織造用又給兩淮鹽價銀

三萬四千兩十一年撤內監暫停造段疋羊絨未  
久復遣既文督南京織造復請增支長蘆鹽五萬  
引鬻之於南詔與二萬引其三萬引兩淮運司給  
以引價福建又有上供絲布九百太倉州有上供  
洗白布六千上初立即頒綵粧絨毼曳縵新式畫  
圖數百種於陝西甘肅鎮巡三司令織造末年又  
頒銀鼠樣皮一十七張令變染柘黃出爐銀二十  
七種正德元年内織染局奏行蘇杭應天諸府織  
造二萬四千七百六十疋內庫向貯諸色紵絲縵  
羅織金閃色蟒龍斗牛飛魚麒麟獅子通袖膝襪  
若胷背斗牛飛仙天鹿具天順間所織皆名禁服

成化弘治以來頒賞甚謹自劉瑾用事倖瑄陳乞  
漸廣僭冒日增庫積一空於是復令應天蘇杭諸  
府依式織造一萬七千四百餘疋十一年命蘇杭  
織造一萬六千七百餘疋內官數奏討鹽引價各  
以一二萬計至有乞關津鹽司不得盤詰者揚州  
鈔關課程亦輒支供機房傳陞御用監官匠皆為  
千百戶副使雜流冒濫府庫殫竭監督織造內臣  
婪賄作威劾奏官吏至世宗時其禍未已帝即位  
之次年即遣內臣之蘇杭陝西南京監織又令廣  
東西河南湖廣每年貢葛布八百疋穆宗神宗登  
極詔皆撤回內臣不一二年亦相繼復遣添機增



匠加造數多神宗初於歲造外添織數萬四年甫完而添織七萬之旨又下張居正爭之得減半又增改織二千令浙江福建蘇松常鎮徽寧揚廣德諸府州分造蘇杭五府織造袍服亦增至歲一萬二千疋從浙江撫臣請減三之一歲二運每運四千萬明年復以發帑織造袍服令與五府歲例一併織造每運三百與五府織染局四千大運同進二十三年命陝西織造羊絨七萬四千七百有奇歲進一運以四千爲率絨疋長五丈八尺每機日織一寸七分二機合織計六月方成疋盤梭暗花工力加難需八月方成蘇松常三府額解布疋長三


丈二尺濶一尺八寸重三觔四兩浙直紵絲紗羅綾綢絹帛山西潞綢舊制疋長三丈五尺至是改爲四丈二尺浙直福建歲改造段價疋扣羨四錢始於三十年至天啓時乃已國初設南北織染局南京供應機房各省直歲造供用未有蘇杭織造後因急缺間行旋即停罷自萬曆四年以大婚題派一次九年復派一十五萬套疋至二十七年前數未完又派四萬一千九百餘疋三十二年復傳補二萬六千餘疋三十八年復派四萬因沿日久遂無罷期陝西織造絨袍亦自弘治正德間偶行嘉靖隆慶時復遣自是以降亦遂沿爲常法矣

燒造之事在外臨清甃廠京師琉璃黑窯廠皆造甃瓦以供營繕宣宗立始遣內臣張善之江西饒州府造奉先殿太宗仁宗几筵龍鳳文白瓷祭器河南磁州造趙府祭器踰年善以贖貨虐下私饋同列御用器事覺伏誅明年遂罷其役正統元年江西浮梁縣民進瓷器五萬餘償以鈔京城西北禁置窯冶東南許去城外五里天地山川壇垣外三里江西瓷器窯場燒造官樣青花白地瓷器不得市鬻私饋又禁私造黃紫紅綠青藍白地青花諸瓷器違者罪死時以宮殿成命造九龍九鳳膳桌諸器踰期又多不及式行在工部請治官吏罪

令改造上下從既又造青龍白地花缸王振以其瑕瑩遣錦衣衛指揮往杖其提督官仍敕內官往督更造天順時光祿寺請造瓷器不允成化間差內官浮梁縣景德鎮燒造御用瓷器最多且久費不訾孝宗立撤回內臣中間復遣十五年從撫臣言取回毀永平窯舊制親王宮殿俱得用青色琉璃瓦如東宮制後吉王雍王所封地土性不宜造琉璃府第皆以素白瓦爲之河南鈞磁二州真定曲陽縣歲燒造餅鐺其饒州磁器正德末復差內官弘治以來積燒造未完至三十餘萬器嘉靖初遣內官督之十年以燒造圖丘祭器不如法叅議



僉事各奪俸一年給事中秦鰲言製造上用器皿皆於南京監局燒造輒料皆於臨清乞悉歸京師工部造器皿天津設輒廠部議格不行十六年新作七陵祭器三十七年遣內臣之江西造內殿醮壇瓷器三萬四十四年添設饒州府通判一員管御器廠燒造世宗營建最繁近京及蘇州皆有輒廠隆慶五年詔江西燒造磁器十餘萬萬曆十九年派遣十五萬九千續派八萬至三十五年猶未畢工內監潘相請添解瓷器船每府一船船費銀萬兩閣臣沈一貫爭之不聽回青出土魯番去京師萬餘里去嘉峪關尚數千里御用回青係西域回夷大小進貢萬曆時命甘肅巡撫購買三十四年潘相奏言描畫瓷器用土青以浙產爲上令廬陵永豐玉山進價明年又令徵本色東陽永康山解折色侍郎劉元震請罷徵不報



圖書

皇朝類編

四



